



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 62/9 prot.

Tiranë, më 08.06.2023

VENDIM

Nr. 993 Datë 08.06.2023

“PËR VENDOSJE GJOBE NDAJ SHOQËRISË GEGA OIL GROUP SHA, PËR MOS NJOFTIMIN BRENDA AFATIT TË PËRQENDRIMIT TË REALIZUAR NËPËRMJET BASHKIMIT ME PËRTHITHJE TË SHOQËRISË GEGA OIL SHA NGA SHOQËRIA GENKLAUDIS SHA”

Komisioni i Konkurrencës me pjesëmarrjen e:

| | | |
|------|-----------------|------------|
| Z. | Denar BIBA | Kryetar |
| Znj. | Leida MATJA | Zv/Kryetar |
| Znj. | Adriana BERBERI | Anëtar |
| Znj. | Rezana KONOMI | Anëtar |
| Z. | Durim KRAJA | Anëtar |

Në mbledhjen e tij të datës 08. 06. 2023, shqyrtoi çështjen me:

Objekti:

Shqyrtimin e sjelljes së shoqërisë Gega Oil Group SHA, për mos njoftimin brenda afatit të përqendrimit të realizuar nëpërmjet bashkimit me përthithje të shoqërisë Gega Oil SHA nga shoqëria Genklaudis SHA.

Baza Ligjore:

Nenet 2, 10-12, neni 24, germa d, nenet 53-64 dhe neni 73 të ligjit nr. 9121, datë 28.07.2003 “Për mbrojtjen e konkurrencës”.

Komisioni i Konkurrencës, pas shqyrtimit të relacionit të Sekretarit të Përgjithshëm; raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet bashkimit me përthithje të shoqërisë GEGA OIL SHA nga shoqëria GENKLAUDIS SHA si dhe relacionit “Mbi llogaritjen e gjobës për shoqërinë Gega Oil Group SHA”,

VËREN SE :

I. Procedura

Autoriteti i Konkurrencës, mbështetur në informacionin e administruar gjatë procedurave hetimore në tregun e karburanteve, si dhe pas verifikimit të ekstraktit historik të shoqërive GEGA OIL GROUP SHA dhe GEGA OIL SHA, konstatoi se, në datë 02.03.2021 është nënshkruar

marrëveshja e bashkimit me përthithje mes shoqërive GENKLAUDIS SHA (shoqëria përthithëse) dhe GEGA OIL SHA (shoqëria e përthithur).

Në zbatim të nenit 10, 12 dhe 53 të ligjit nr. 9121/2003, me shkresën nr. 62 prot.i AK, datë 23.01.2023 “Mbi fillimin e procedurës së kontrollit të përqendrimit.”, ju kërkua shoqërisë GEGA OIL GROUP SHA depozitimi i dokumentacionit të përcaktuar në Rregulloren “Për zbatimin e procedurave të përqendrimit të ndërmarrjeve” dhe fillimin e procedurave të kontrollit të përqendrimeve.

Me shkresën nr. 62/1 prot. i AK, datë 08.02.2023 “Kthim përgjigje shkresës tuaj nr. 62 prot., datë 23.01.2023” dhe shkresën nr. 62/2 prot.i AK, datë 16.03.2023, shoqëria GEGA OIL GROUP SHA depozitoi dokumentacionin e dosjes së njoftimit të përqendrimit.

Më datë 02 mars 2021, ndërmjet shoqërive GENKLAUDIS SHA (Shoqëria përthithëse) dhe GEGA OIL SHA (Shoqëria e përthithur) është lidhur Marrëveshja e Bashkimit me Përthithje.

Referuar kësaj marrëveshjeje, GEGA OIL SHA ka transferuar tërësisht të gjitha aktivet dhe pasivet e saj tek shoqëria GENKLAUDIS SHA dhe shoqëria përthithëse është quajtur GEGA OIL GROUP SHA.

Struktura e zotërimit të kapitalit pas bashkimit me përthithje të shoqërisë GEGA OIL GROUP SHA është: Z. Paulin Gega 82%, Z. Klaudio Gega 9% dhe Z. Genc Gega 9%.

Referuar marrëveshjes si dhe pasqyrave financiare të palëve, transaksioni përbënte një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë ishte objekt autorizimi nga Komisioni i Konkurrencës.

II. Njoftimi i përqendrimit në shkelje të afatit ligjor

Bazuar në nenin 12, pika 2 të ligjit nr. 9121, datë 28.07.2003 “Për mbrojtjen e konkurrencës”, një përqendrim duhet të njoftohet pranë Autoritetit të Konkurrencës brenda 30 ditëve nga lidhja e marrëveshjes.

Në zbatim të nenit 53 të ligjit, kanë detyrimin për njoftim: a) ndërmarrjet pjesëmarrëse në bashkim; b) ndërmarrjet që marrin nën kontroll të gjithë ose pjesë të një ose më shumë ndërmarrjeve të tjera; c) në rast krijimi të një ndërmarrjeje të përbashkët, sipas pikës 3 të nenit 10, ndërmarrjet që kanë kontrollin e ndërmarrjes së përbashkët.

Në rastin e bashkimit me përthithje i shoqërisë GEGA OIL SHA nga shoqëria GENKLAUDIS SHA, detyrimin për njoftim e kanë të dyja shoqëritë e përfshira në transaksion.

Referuar dokumentacionit të depozituar konstatohet se transaksioni nuk është njoftuar brenda afatit të përcaktuar në nenin 12, pika 2 të ligjit nr. 9121, datë 28.07.2003 “Për mbrojtjen e konkurrencës”.

Nga vlerësimi i dokumentacionit, Komisioni i Konkurrencës evidentoi faktin se shoqëritë pjesëmarrëse në transaksion (Genklaudis SHA dhe Gega Oil SHA) kanë kryer shkeljen administrative në kuptim të nenit 73 të ligjit nr. 9121/2003, e cila konsiderohet si shkelje e lehtë.

Shoqëritë nuk rezultojnë të kenë kryer shkelje të mëparshme në kundërshtim me ligjit nr. 9121/2003 “Për mbrojtjen e konkurrencës”.

Pas vlerësimit të efekteve që ka sjellë transaksioni në tregun përkatës, u konstatua mbivendosje midis aktiviteteve të palëve në nivel kombëtar në tregun e naftës dhe benzinës, por pa efekte të ndjeshme në strukturën e tregut përkatës për shkak të pjesës së vogël të tregut të ndërmarrjes së përthithur.

Për mos respektim të afatit të përcaktuar, bazuar në nenin 73, pika 1, germa dh) e ligjit nr. 9121, datë 28.07.2003 "Për mbrojtjen e konkurrencës", Komisioni i Konkurrencës vendos gjobë në masën jo më shumë se 1% e xhiros totale të vitit paraardhës financiar, mbi ndërmarrjet apo grupimet e ndërmarrjeve nëse nuk njofton një përqendrim, sipas neneve 10 dhe 12 të këtij Ligji.

PËR KËTO ARSYE:

Komisioni i Konkurrencës, në bazë të nenit 24, shkronja d dhe neni 73, pika 1, germa dh të ligjit nr. 9121, datë 28.07.2003 "Për mbrojtjen e konkurrencës",

VENDOSI:

1. Vendosjen e gjobës mbi shoqërinë GEGA OIL GROUP SHA, në masën () lekë, për mos njoftimin brenda afatit të përqendrimit të realizuar nëpërmjet bashkimit me përthithje të shoqërisë Gega Oil SHA nga shoqëria Genklaudis SHA.
2. Ngarkohet Sekretari i Përgjithshëm për njoftimin e palëve.

Ky vendim hyn në fuqi menjëherë.

KOMISIONI I KONKURRENCËS


Leida MATJA

()
Zv/Kryetar

Rezana KONOMI

()
Anëtar

Adriana BERBERI

()
Anëtar

Durim KRAJA

()
Anëtar

